



木  
記言別集十卷

丘墓  
行狀  
遺事

~ 16  
2346  
21

記言別集






門和  
號 2346  
卷 2/21

記言別集卷之二十五

丘墓文

李慶士墓表

慶士李居周子逸其先本廣陵人其族徙閩西  
之安水數世父禮賓主簿春郁君生九年父亡  
長而無所學其伯父春兩泣謂曰若父死若幼  
無所知撫若謂曰母失教也我武人無以教若  
恐負若父言客有李信培者好書稱博於業者  
也遂屬之君能日讀書立行事諸父如事父君  
有父祖業頗饒好賑窮恤貧人謂之義箴有親





戚死而其孤兒無所依者必收育而嫁娶之其少受業師死為之心喪三年其篤於行而厚於報禮如此萬曆末遼左陷敗我西鄙多事及國家與奴絕和親日出兵戍邊君憂之曰自此兵禍迫矣遂挈妻子入海西之首陽其後國連被兵卒至於丙子之敗生民糜亂且盡而君得全於亂君少時累舉於鄉卒不利及光海之末君耻之棄舉子業樂讀誦孔氏傳尤專於易亦不喜百家雜術之學客有問易君曰今日客與主人言易也六十四卦三百八十四爻象天下之

理盡也七十五死於首陽臨死曰死生之理已知久矣無一戚戚之色葬於其鄉妻江城文氏先十二年死葬於安水乃合葬焉閩西近多儒學之士如安定韓禹臣沸流朴大德樂浪鮮于浹名譽相望鮮于氏最著名又有隱君子如此人者惜乎埋沒而不見稱於世也男克華我寧廟元年進士孫若龍若虎若龜若龍又其四年生負

護軍金君墓陰記

公諱天柱字

姓金氏本新羅之苗裔也高



麗時有金仁瑄者事睿宗為檢校太子太師後世顯者不絕恭愍時有觀察使自粹我朝初有知中樞永濡 中宗時有刑曹參判世弼亦名臣事在己卯事中於公為曾祖祖礪有文行阜世父喜慶以叔父佐郎礪死於乙巳事遂沒名不出於世也母蔡氏獻納無逸之女我昭敬時以門地署為齋郎罷歸鄉里仍不樂仕進老於田園八十年 純孝初以壽陞正三品為折衝副護軍公以名家之後又連姻皆貴家大族重於鄉慈仁壽考敦厚有至性遠近歸心尊事

之甚恭八十九歿娶故兵曹參判安士雄女生二男二女長男仁龍儀賓府都事次仁鳳贅二人府使金克銓士人許誥內外曾玄之世甚眾今其三世孫益昌 孝宗三年以博士科進為某官將立碣墓前問於孔岩許穆穆叙其事識其陰

司憲府持平鄭公墓陰記

鄭氏系出晉陽高麗時有文英公吉孚始居上黨四世至判官仁亨仕我 恭僖時好廉潔嘗言曰不為贖貨以累子孫仁亨生磯遊宦五邑



終安峽縣監亦以廉介稱磯生公公諱思顯母  
昌原黃氏公性寡言喜文學受業於慕齋金先  
生與陳宇金禧年張重任柳敬仁齊名為友宇  
與公為表兄弟皆以名行重於時有用事者嫉  
之以為譏議朝廷逮繫拷訊將論死賴世子力  
諫流竄而止宇不免公謫懷川三年用事者敗  
而事得解 恭僖十八年選國子試二十四年  
對策選入槐院為翰林史多直筆可信同館皆  
敬憚 恭憲十三年以母老乞郡出唐津未一  
年以疾歸後或由禮曹或由講院三為持憲持

論嚴正不饒貴婢好直言有古諫臣風有權貴  
子弟因緣得科公論削科 上持之言卒不行  
貴婢多不悅十八年丁母憂啜粥哭未卒喪而  
歿公 恭僖四年十二月八日生 恭憲十九  
年正月九日歿年為五十五公事親孝處兄弟  
善臨財廉好直道居官事君以隨俗苟容為恥  
令人李氏我 恭靖大玉五世孫而高興副守  
億千之女也公歿後二十九年年八十一而歿  
其親戚至今傳其婦德云皆葬上黨有三男二  
女男直長吉僉正谷監察若膺二人承旨趙守



準縣令閔德鳳吉生以健督二人正郎柳敬元  
正郎玄德升谷生以震以觀督三人察訪宋邦  
祚士人金善生縣監趙廷鸞

東昌尉權公神道碑銘

權氏本新羅苗裔也始祖太師幸事高麗得姓  
為權氏子孫貴顯至領都僉議溥其世益大於  
公為十一世公諱大恒字應貞曾大父同中樞  
贈領議政東興府院君常以孝特聞至今五世  
百年薰陶坊遺宅有孝子旌閭大父行都承旨  
贈右議政禧亦 昭敬時名臣事在太史皇考

同中樞 贈吏曹參判益中能世其篤行以壽  
考貴母貞夫人趙氏籍漢陽良節公溫之八世  
孫而縣監瑞之女也萬曆三十八年庚戌十月  
十九日公生 純孝大玉八年尚貞和翁主例  
授爵東昌尉丙子之難從 上於南漢以勞進  
資義再典禁兵為副檢管性忠樸慈謹樂儉素  
善與人謙約為恭不以尊貴自居及父母年高  
公亦且氣衰而忠養不怠每以佳辰壽節會族  
入賓客上壽為樂以承權心仁愛篤厚諸父昆  
弟之貧者有待而舉火如同爨而食者 上之



七年丙午正月四日公卒享年五十七上賜  
吊賻如儀命有司應葬事禮也後月葬揚州於  
登寬谷之原有外祖曾祖二世之葬在此趙氏  
乏祀公受後事者也主 昭敬大王女而溫嬪  
韓氏出也韓氏中古宰相繼孫六世孫也主生  
於 昭敬大王登遐之前四年甲辰二月廿二  
日卒於後甲辰四年丁未九月廿四日享年六  
十四後年三月祔葬同原無子取兄子德徽為  
後方為韓山郡守生四男四女男慶運後經女  
二婿沈最良李微餘幼又側室子男女二人男

德績女適太常主簿宋胤吉銘曰  
冲儉雅飭篤於仁親貴而能下富而能貧美乎  
積行之家世有其人

安長老墓表

長老諱船字濟仲姓安氏其世出自順興古賢  
人安文貞公軸之後裔也父國子上舍孝仁母  
余陵具氏居龍駒性至孝善養父母鄉黨稱之  
當兵革之世具孺人歿恨喪之不得盡於禮也  
常自痛及先府君歿既三年更為母行追喪之  
禮長老已五十四三年哀毀如初追慕如嬰兒



每遇忌辰必入其月不食甘旨以及其日年八十而歿既葬其孤子顯道聞吾善言善行請刻石其葬不沒其先人之孝吾識而記之因書其墓曰壽孝安長老之墓 上之四年賜老人爵長老以壽考受爵折衝將軍行龍驤衛副護軍

漢陽趙公節婦成氏雙墓銘

趙公諱熒字士安漢陽人曾祖成均進士光震祖司饗參奉鍵父宗簿直長大男母德水李氏文成公珥之妹也公少有高行其先府君亡公十五其居處哭泣感人行誼著聞有石田成上

舍以女妻之上舍諱輅居西湖潔身獨行公一以事父者事之公樂坦易平生與人無愠色善吟詩有筆妙於山水尤佳性喜飲酒不屑屑於世也當兵革之世浮海避亂於靜州之君山與星山金輅遇於客途與語結為友作君山二友圖又有詩與序傳其世及賊陷湖南復浮海而北輅妻方娠舟中入曰舟行忌孕婦當下之公曰此迫之令死也義不相棄欲與俱下成上舍曰舟中多人豈以一婦人故俱死也止之輅家得全後輅仕為某官公三十五歿葬於坡平之



紫雲妻成氏生十四母亡祖母崔氏老病成氏  
事之至誠上舍不更娶曰有老母在堂娶而不  
得良妻不如吾女賢足以能養成氏至孝於事  
親之節必先意順適以盡心仁及親戚一族化  
之及公得死病經年成氏苦形焦心日給醫藥  
入有不忍違其誠及卒不救不食哭自苦如初  
喪三年以老上舍故雖強食為之六年不除衰  
於是遠近皆知節婦之行也萬曆末旌表其閭  
李相國廷龜訪成上舍於西湖必拜於門以致  
敬其節行云六十六歿柩葬同原男成後亦篤

善自守能世其家訓孫四人滾澆沈澆銘曰  
趙之父成之母匹行之有光於乎其子孫之承  
且長

判中樞府事許公神道碑

公諱徽字徽之姓許氏其世出自孔巖村主攷  
之譜牒自高麗來凡貴大諸族内外多本於孔  
巖者據世紀至公蓋二十三世成化間有相國  
文貞公諱琛於公為五世祖文貞公四世有知  
中樞事諱晉無子擇於兄弟之子公最賢遂子  
之公初筮仕當我 昭敬大王四十年後九年



為陽川縣令其年中樞公卒既除喪則當光海  
政亂士大夫潔身者多引去公遂不復求仕耕  
稼以自給及中興世有推薦者為安城郡守後  
為醴泉郡守利川都護府使大嶺內外物衆而  
饒人民雜商賈逐末利其俗多獷悍大盜利川  
醴泉號為尤甚公立約束鈎得姦猾誅其巨魁  
釋其餘歸本業為良民 上多之遷至嘉善大  
夫乙亥入為同知中樞丙子出尹東京有當路  
論之不已 上不聽移廣州牧前年虜將僭位  
號虜使來朝廷却之彼初以為雖守禮義之國

以強恟之將莫之為何及却之甚慙反自疑被  
拘即出走街間必年執瓦礫共逐之於是大言  
者皆曰人情皆欲伐賊公憂之曰今虜方強而  
由我速禍不出一年當有大寇南漢為王城扞  
蔽務蓄積修器械增築南城堡樓以備臨城之  
寇冬虜果大來 上急出幸南漢城中受圍四  
十餘日士無飢色蓄積有餘 上愈益嘉之特  
進資憲大夫陞廣州府尹戊寅入為知中樞遂  
拜刑曹判書寵賜之甚厚常號之曰圍城中主  
人庚辰以漢城府判尹出為江都留守復入為



判尹者再居中樞者又再丁亥以壽陞崇政大夫為判中樞時公年已八十子啓嘗以京畿觀察使方為騎省亞卿孫瓌珽珽皆舉進士珽繼以乙科進矣己丑判考工一年以老辭復為判中樞二年秋請未死乞暇省修先人墳墓上賢之賜澆奠加厚之至明年二月卒壽八十五夫人上黨韓氏殿中某之女前二年八十六歿皆葬長端鰲洞世葬公年益高爵位益崇而愈恭謹雖親戚卑幼不衣冠不見俸入既饒必頒諸宗族隣里之貧者好儉素居處被服如韋布

士常歎之曰吾受國大恩無功業父子皆至列卿一心報 殿下斷斷無他願也恒言以大盛為戒善乎公簡靜謙下自守貴不遺賤公以此壽以此貴以此教其家而為法所蒞百姓信之追思不忘者亦以此云銘曰

溫溫維德吉人之則三命愈恭孔父俯躬玉佩長纓皤皤黃耆天享大耄慶及厥後

羅州牧使朴公墓表

先生姓朴氏諱光玉字景瑗其先本陰城人自四世祖太學生負繼陽始居羅州子孫遂為光



州人先生有至性生七歲先府君歿其哭泣持  
喪既以善行聞及長事母至孝居家奉先禮節  
甚修人愈益賢之二十一陞上庠嘉靖中修鄉  
學先生作學規出其財增學田立家塾教授生  
徒弟子日進及先夫人歿既葬毀粥哭幾滅性  
牧使崔應龍以禮勉之令返魂歸我 昭敬即  
位召用才學之士有大臣薦之授內侍教官三  
年陞宗簿主簿尋補雲峯縣監未赴登甲科因  
兼記事官既到任修縣學出羨餘數百斛穀以  
供諸生選縣中子弟令日居而講學焉既去縣

父老刻石紀其治績後繼為湖南湖西都事已  
卯入為禮曹正郎兼記注官一年移司憲府持  
平俄改成均館直講夏差行臺賀聖節還復拜  
持平累轉為相禮兼編修官癸未出守靈光後  
年召為成均館司藝知製 教辭不就三年復  
出密陽先生每為邑必禮接士大夫論政要專  
以興學為務己丑復入為司藝司監寺正尋移  
太常以病還鄉里壬辰夏有倭寇郡縣皆潰及  
賊陷尚州先生見牧使丁允祐曰賊若逾嶺京  
師急矣公盍往說方伯急引兵直趨畿甸以捍



衛京師乎允祐心然之即從其計策官軍既連  
敗陷殺而賊長驅五月車駕已西幸又湖南  
兵敗於公州人心大亂先生與金千鎰高敬命  
謀舉兵伐賊約束既定高敬命起兵於潭陽而  
先生病不行召募子弟治軍食備器械以助兵  
勢金千鎰遺書先生曰大軍一出本根不固無  
所可恃也用兵利鈍其權專在足下時權慄為  
光州自隋城不利常憤恨日傳檄郡縣召集義旅  
諸散軍稍稍有應者先生分遣父老曉諭傍邑  
致數千人權慄大悅每事必咨於先生七月拜

判校俄改羅州牧使先生曰雖病力義不辭難  
至州能辛苦務合人心收散兵欲再張伐賊聲  
勢計畫已完病篤解印綬歸其十月丙午歿人  
皆惜之臨歿遺命薄葬閏月丁酉不用擲葬於  
雲洞雲洞者其先墓所在也先生德器甚厚和  
而能嚴使人愛而可畏對人未嘗言人之過而  
好揚人之善非其義也不以取人亦不以與人  
其學晚而尤用心於易禮亦博學多通如高峰  
玉溪思庵諸老德所推許云好節儉累典州郡  
不歸厨傳或言之先生曰吾不願為飲食之人



人愧服常建崇本堂於雲洞出臧獲以供墳墓  
之祭每以朔望率宗族子弟講信行禮與鄉人  
立約條一以厚風俗篤人倫為本扁其所居室  
曰懷齋故學者稱之曰懷齋先生先生歿後九  
年南方學者立祠以享祀不絕也先生自三世  
居光州伯父鵬為翰林父鯤為司藝先生重於  
南州號為名族母尹氏籍海平慶安道察訪仁  
孫女也先生 明世宗嘉靖五年我 恭僖二  
十一年正月巳酉生 神宗萬曆二十一年我  
昭敬二十六年歿年六十八先生無子有女賢

四人禮曹正郎柳思敬士人盧士詹金隆址宣  
教郎林恢今盧抑絕嗣而外孫前尚州牧使林  
瑞前翊衛司侍直林埴士人金圻皆有子孫甚  
多

黃海道觀察使成公墓誌銘

公諱俊耆字德甫姓成氏本昌寧人高麗門下  
侍中松國之十二世孫也其世多名公巨人號  
為大族高祖世貞開城留守曾祖倫吏曹叅判  
祖效寬黃山道察訪潔身篤行聽松慶士成守  
琛稱之曰君子人也不幸早世父以文弘文館



副提學母淳昌趙氏司憲府監察所之女也萬曆二年我宣祖七年十一月九日公生自為兒時已有長者氣宇不屑屑於嬉戲十七始讀書勤苦自力十年而學成登第當宣祖三十二年初選槐院為正字著作三年遷侍講說書尋改藝文檢閱累轉弘文修撰移吏曹佐郎兼記事官四年由校理為吏曹正郎明年以繡衣出關西入為都堂舍人俄改應教兼春坊輔德戊申光海即位首殺柳永慶盡逐先王近臣公初安置南海遷西塞之碧潼南北累千里戊

午有遼左之後西鄙始多事有用事者譖罪人以國陰事暗與虜通盡遷之公遷梁山梁山東南海上窮處遷謫十六年申夫人歿而無子又提學公歿公哭之幾滅性既沒喪之明年仁祖改玉釋公為青松府使方羸瘁病不赴後為舒川尋罷因客於湖外後年李适叛聞京城急馳赴亂上已南狩傾財募士傳檄郡縣為討賊計賊平謁上於行在所拜軍資監正時西鄙多事宰相薦之出為宣川一年以治理賜表裡丁卯虜犯闕內朝廷以計却虜命公管餉



兩西兼贊畫使兩西新刻於兵百姓流離飢饉  
庶事板蕩公計不知所為時都督毛文龍軍振  
島素相信得累萬斛穀以賑之西民大賴都督  
多公之義又餽遺累千金公殖兵餉八年調粟  
四十萬石物貨累巨萬牛畜累萬頭 上多之  
特進嘉善為黃海道觀察使及辭朝 上勞慰  
曰十年關西勞苦多矣予知卿才過人當此時  
西藩之任捨卿而誰也關西之人立碑江上不  
忘其遺愛云海西壤接關塞為畿外要衝築城  
池治軍旅修器械人心倚以為固秩滿拜同中

樞移判決事壬申出為安東明年卒於官年六  
十訃聞 上遣禮官賜祭追 贈左贊成申夫  
人為貞敬夫人夫人掌令橈之女側室子二人  
後龍後嬖女一人武舉人權得元妻也後龍某  
官有二男琬璟公忠厚有容貌望之知為厚德  
長者喜怒不形雖妻妾子弟不見疾言遽色好  
施予篤於親戚踈遠不遺樂善好士不喜崕異  
當官御下不苛不迫撻攬大體不問細故人皆  
盡心思效莫不歸心善於知人金相國溼困時  
人莫以為奇也公曰此人他日必貴後相國溼



功業既盛以知已推公嘗在關西正言南銑以  
誹謗欲駁之相國溼戒止之後南銑爲西郡觀  
公之所爲也深悔之每見公改容事之公嘗言  
曰古人云活千人子孫必興吾當亂世荷國  
恩活人命累萬吾後世不絕公歿初葬於揚州  
後三十二年宅坻不利改葬平山西面金剛山  
乾坐之原與申夫人合葬銘曰  
始而顯中而危晚而績西民則憲

贈左承旨林公墓碣銘

公諱快字子懼姓林氏羅州人曾大父諱枰湖

南兵馬虞侯 贈兵曹參判大父諱鵬守東都

尹 贈禮曹參判父諱復承文院正字 贈兵

曹判書母南平徐氏 贈貞夫人公資稟溫厚

篤於孝弟好施與著德茂行蓋公少孤而服膺

徐夫人教訓如此不敢怠人賢之先府君有奇

氣大才不幸當路者排之竟坎軻於世以歿公

兄弟二人皆賢將期其大發矣伯公婚果達爲

大官其二子棟墀俱顯於朝而獨公早世名不

立故伯公每對諸子言歎息悲其賢而不祿配

陰城朴氏既娶孀親戚不忍聞其哭聲事姑有



至行稱孝婦云故司憲府持平諱光王之女有  
子二人瑞璋讀書慕義交結一時賢豪士俱知  
名於世瑞某官嘗以靖社原從例 贈公正三  
品承政院左承旨兼 經筵叅贊官朴氏爲淑  
夫人璋前某官瑞娶金氏生子三人一儒處儒  
長儒女一人適某人又有妾子女五人共六男  
三女璋娶吳氏生女二人適某人某人子一人  
之儒皆秀而文一懦弱冠已舉進士吾聞樹德  
而不發者其後必昌天之報施善人者豈誣也  
公生於萬曆元年其二十六年二月十三日歿

其年十月日葬於錦城西從先人之次當倭奴  
陷湖南之歲奔竄湖右歿而歸故過時乃葬崇  
禎十三年冬刻石墓前因并記其年月日銘曰  
天之於善人既窮其命而殀其身復待子孫而  
厚報者吾知其可必也

淑夫人朴氏墓碣銘

夫人姓朴氏系出陰城見於族書曾祖諱子回  
叅奉祖諱鯤成均館司藝父諱光玉司憲府持  
平世所稱懷齋先生者是也母南平徐氏夫人  
生有令德温愉婉順誠飭雅謹動合女範十八



歸于林氏雞林府尹 贈禮曹參判諱鵬之孫  
承文院正字 贈兵曹判書諱復之少子諱恢  
字子耀亦以名人之世又秀而雅爲湖南人士  
之所指名二十六卒時夫人二十八矣哭泣逾  
節聞者大感事姑盡其誠承意順適姑徐夫人  
稱曰孝婦二子端璋皆自幼稚能讀書勉行立  
於衆人而人信之者皆夫人之教也端前某官  
嘗以靖社原從例 贈先考爵正三品夫人爲  
淑夫人璋前某官俱權愛克順事之無違志皆  
曰能養夫人享年六十七卒端娶金氏生一儒

處儒長儒女一人適某又妾子女五人皆幼璋  
娶吳氏生之儒女二人一人適某一人適某夫  
人既嫠孀能教養二子俱以名譽得仕孫一儒  
舉進士而其次皆讀書爲文人其幼少又多岐  
嶷可期其昌大矣非特林氏世福未艾抑亦賢  
婦人之報也夫人歿將葬卜地不吉殯於羅州  
三鶴山下至明年得吉於咸平縣某里某原乃  
葬凡再易地而安其宅地是宜子孫之吉祥而  
無災無殃是爲銘

林谷處士林君墓碣銘



處士南中高士 孝宗四年穆南遊至嘉樹觀  
龍門水石因造處士之廬請見之處士遇我如  
平生相對語儀狀抑抑論議卓然真巨人長者  
處士前古聞人瞻慕堂林先生之孫餘教不衰  
賢者之世又有此人心敬之未久聞其訃嗟乎  
耆耆皆亡使後人無復考德而問業今其諸孤  
以其先人之狀千里問銘善乎亦孝子之心也  
處士光海四年進士見世亂不復求舉隱居自  
守及中興世累 召爲大君師傅即辭去放跡  
山澤以潔其趣嘗名其室曰自知軒又曰林谷

病慵後寓居陝川九曲之下仍號曰九曲老夫  
處士生於萬曆十四年九月十二日歿於我  
孝宗九年十月五日年七十二明年正月二十  
五日葬于林谷先塋北南向之壠處士諱真愆  
字樂翁姓林氏本恩津縣人始祖成權仕高麗  
官至太常博士曾祖得蕃成均進士祖芸延恩  
殿參奉以孝特聞此所謂瞻慕堂林先生者也  
父承謹早世母光州盧氏父欽隱德不出別號  
立齋處士早失先人學於盧氏既長從蘆坡李  
上舍學益博行益修篤於親戚忠於交友寬而



有容與物相裕至於臨利害正是非一言足以  
畏人鄉人皆敬之事母至孝常受訓戒曰自吾  
為汝家婦未見汝先君子急惰散容興必斂束  
居必端坐汝宜勉之處士服膺不失終身誦之  
性恬靜好儉素不慕輕暖不恥蔬糲曰溫飽足  
矣昔吾先子教於家為子孫守此也敦厚好禮  
尤致意於喪祭有所定禮略一書宜人李氏龜  
巖李先生之曾孫處士治家有法亦多李宜人  
賢行云與處士同年生後處士九年而歿為八  
十生二男一女男汝松汝栢婿鄭彧汝松三男

東逸東遇東遠女一人婿鄭天徽汝栢四男東  
茂東說東迪東野女四人一婿姜舜舉餘未筭  
鄭彧三男錫球錫龜錫珪婿一人李暘銘曰  
篤而裕高而不竒碩人之寬碩人之儀

晉州南君墓碣銘

穆榮禎間避亂南中南君因吾弟懿累致眷眷  
之意為相好穆以羈旅常感其義穆落南之三  
年君死穆為之哭吊其孤子霽既卒喪將刻石  
表其先人之葬乞銘於穆曰吾父歿而無名幸  
而為吾子知葬而有吾子銘是吾子終惠吾父



敢以請穆悲其言許諾問其族世系銘曰南氏  
本於宜寧高麗密直副使君甫之後密直之葬  
在宜寧縣西郭門傍南氏見於族譜帖甚舊而  
且世有達官爲大族及曾大父諱至以門蔭授  
宣務郎既不得仕家於晉城治產業至巨萬大  
於其鄉大父諱泰亨父諱曄居鄉皆以長者稱  
母鄭氏節度使殷富之後君諱某字 君頗  
傳舊家餘教能親愛九族吾弟嘗娶於李氏南  
與李皆出一祖吾以此知君而因得君之權君  
年五十五死其死在崇禎十三年某月某日其

葬在同年某月某日妻尹氏亦坡平舊族其大  
父鐸當 宣祖世有倭亂以義從諸將士入晉  
陽城城陷戰不出追爵某官君有子二霽霽

泗川崔子墓表

崇禎間穆避亂南海上於泗川龜山禮賢入祠  
從諸生得聞遺風餘教間巷善行萬曆中有崔  
子者少孤無所學日從輕薄兒其母憂之自撻  
以示警崔子痛自責遂發憤讀書勉劬修行自  
此凡知崔子者皆曰善士而又薰其行而善良  
者將日多崔子三十八死無子云其贅婿白瑞



羽請所以標其葬者穆因叙其族姓名銘曰  
崔子諱世寧字亨甫其先本朔寧人高麗門下  
平章事瑜價之後其世多達官聞人自高曾之  
世連不達落南其曾大父是大父偵父演皆葬  
泗川嗚呼以崔子之善士而哀其無後繼者

僉知中樞崔公墓碣銘

昔者師心李英彥丈嘗稱之曰崔伯瞻善行自  
守古人也吾慕之得因於李丈往從之猶恐其  
不肯也公廉介人也直而剛好善無已嗟乎今  
二丈皆亡吾衰老後死嘗慕公潔身修行李丈

知人取友若此公之外孫申啓澄以公之言行  
問銘於吾不亦善乎吾嘗親事長者當論撰其  
美吾安敢不勉公諱律伯瞻其字也崔江陵著  
姓曾大父某有文學 恭憲朝擢為王孫師傅  
世子早卒 昭敬幼時 上擇於諸王孫心屢  
之置師傅云大父某司憲府監察父某博士科  
選躡躡歿於考工部後有宰相以篤行白 上  
追爵承政院都承旨母茂松尹氏 贈相國某  
之女公初仕於 昭敬朝為廣興倉主簿罷及  
光海政亂因不出者二十年中興初有推薦者



再為殿中後監咸悅縣三年有治理效當丁卯  
之亂能奉期約禁暴亂賢於列邑 上賞其能  
擢正三品秩為中大夫後一入中樞自丙子來  
自泯沒不復求仕忘世於海上者又十七年年  
七十八歿墳墓在長湍白嶺嗚呼窮達命也見  
義能守樂而終身殆古之遺義公既歿家法不  
衰子孫猶有孝悌之風夫人南陽洪氏都事某  
之女無子以兄弟之子某為後婿一人地官佐  
郎某應澄啓澄外孫也銘曰  
行篤而志清嗚呼廉士之貞

翊衛司衛率洪公墓陰記

公諱有燭字次晦姓洪氏系出南陽 贈議政  
仁祐之曾孫端敏公進之孫 贈唐昌君汝栗  
之子退陶李文純公滉之外玄孫也萬曆十八  
年十月廿三日公生生十一年先府君歿二十  
三陞上庠三年以門地初授掌苑署別提其年  
端敏公卒公以早失先人其哭泣居處一如執  
親喪者期年丁巳陞漢城府參軍戊午為司憲  
府監察尋改工曹佐郎後為谷城縣監戶曹佐  
郎丙子為安東都護府判官乙酉為工曹正郎



丁亥先夫人李氏歿既三年庚寅爲翊衛司衛  
率其年八月廿三日公歿年六十一其十一月  
廿六日葬砥平切雲以扈 聖原從追爵左承  
旨兼 經筵叅贊官公平生喜恬澹惡不善不  
撓形勢篤於親舊有如古人者夫人清州慶氏  
高麗名臣慶復興之後而僉知中樞遲之女也  
有子男三人景基景增景墳景基早歿女四人  
其婿正言李暹生負朴自振進士柳哲生學生  
李翊夏

壺溪公墓誌

壺溪公諱晉暉字子舒梅墅姜學諭之長子也  
才聰明華屬文長於詩與才子權鞞具容相友  
善一時願交者衆家園有脩竹慕之者求得一  
枝必誇於衆曰吾今日從姜子舒來矣其見景  
慕如此而嘗受學於牛溪先生名益重當兵革  
之世國大亂鄉父老聚子弟起兵而無所屬嘗  
重其名且曰當倚名族推公爲將公以少辭之  
推義兵將禹性傳嗟乎公有仁孝行性簡潔不  
群於衆人萬曆二十二年甲午始筮仕轉司圃  
署別提後又爲 睿宗陵寢齋郎後年歿年三



十牛溪哭之曰二氣交運參差而不齊賦生之類衆而精秀者間或值焉以其間值之難而不得其清清者或不得厚長不幸遭世之亂飢寒窮夭而死余所以長慟深悲者也具容詩有嘗過漣川追悼姜子舒作人誦之公娶士人金億女無子取其弟某之二某為後

王子仁興君墓碑銘

王子諱瑛字可韞我宣祖諸王子也母靜嬪閔氏江華都護府使士俊之女也宣祖三十七年二月七日王子生生而穎悟上每問幼

戲舉止甚愛之長則仁孝好學樂善不已上登遐之年王子生五年居位哭一如成人人莫不歎息以為賢王子也七年創受封為仁興君光海踈忌親戚不置師傅既二十而亦無為王子揀擇事也王子受學於長王子初長王子韜晦不出難以兄弟之愛亦不欲教訓為事心知王子賢而好學乃教之也王子既得聞修己之方恪慎孝悌動有禮節及仁祖反正乃選宋夫人明年李适叛入京城上南狩王子從上既渡江疾暴發諸從者皆曰疾甚矣且就母



嬪所疾差間往無不及矣王子曰不可力疾馳  
行追及果川上謁 上爲之動容勞之而士大  
夫皆爲王子喜丙寅母嬪卒前年長王子流海  
上母嬪憂思積疾至是殆不可醫王子色憂不  
怠夜不解帶躬執湯藥絕則斫指進血亦沐浴  
祈天母嬪常泣言長王子不已王子上疏曰母  
病奄奄死命已迫長子珙負大罪寬在囚籍乞  
母子相見 上感之特赦還令中使替發夫馬  
送之至則母嬪已歿矣既葬有虜寇 上出幸  
江都 命二王子起復從 上事平反喪服王

子居喪啜粥哭幾滅性既卒喪 上召見慰諭  
之命有司 賜居喪未受祿俸如數加 賜旣  
馬以寵厚之前年長王子歿於極南之沃州王  
子喪之既終期之月仍無服而哭之三年壬申  
仁穆大妃薨王子居喪毀甚 上勉以權制王  
子泣辭以終三年丙子之亂王子從 上於南  
漢虜圍城急王子曰禮主辱臣死欲自燒殺及  
約成人心涵懼言 車駕下城則當被驅北行  
王子泣而請從體相臣瑩曰彼令我群臣從  
上者數已足不可 上特減衛士以從王子



上宗以賢之自是待之加厚於平日乙酉兼管宗簿寺司饗院事益勤上每稱之曰恪勤賢勞時歲凶國不足王子出尚食金三千以助度支經費自多亂之後四方上供減半王子啓上以爲今事定已十年不可以一時便宜擢省廢四方惟正之供己丑仁祖之喪居服舍食蔬食至卒哭時址使來將報聘事甚難諸大臣僉曰非王子不可上以尊屬故不欲強之也王子曰臣事君義不辭難即請往上愈賢之時當沍寒特賜內府貂裘豹帳遣御醫

從之且令中使護行以往前此奉使者以彼求索多無厭路費常數不足必請益以往王子不請益捐私橐以贍用有胡譯馨長狡猾多生事以爲勢奉使者亦莫能也王子自受命禁不許私謁一繩其不如法者馨長陰怒王子日作梗碍百端留館五十餘日不許竣事一行懼之王子不撓也及使還上爲之勞慰甚加辛卯春患風眩病數月疾甚上憂之醫藥屬路疾尋已仍上疏乞解兼管職上不許其十一月二十五日薦歲事於先嬪仍令侍者掃修廟內



即日命駕歷見姊妹諸翁主疾作還至第遂卒  
上遣太醫已無及矣 上悲慟不已不視朝三  
日停 世子嘉禮不舉常膳七日 賜賻襚加  
厚又 賜長生梓材令中貴人眠治喪事 特  
遣知申事行吊又 賜郡夫人月俸不絕也明  
年正月十六日以禮葬永平和德之原國家自  
丙子被兵十七年王子貴臣禮葬令式多殺節  
上命特用成禮以葬王子自光海二年初受封  
至今四十二年春秋四十八性至孝事母嬪從  
長王子同爨而養者二十年 仁祖三年長王

子遷之海上四年母嬪歿喪三年然後乃始異  
居祭祀則必宿齋於宗子之家如朔望俗節小  
祀亦然節祀上塚必素服行事如忌日之禮每  
遇忌日悲慟如初曰禮君子有終身之喪忌日  
之謂也外祖母孟夫人年高王子事之一如母  
嬪時忠養不衰長王子歿而其家斥在海島王  
子資其衣食一如其家篤於宗族踈遠不遺平  
生不立崖異不循苟且居處必謹與人必恭教  
家必嚴內外戒驕溢畏慎戒飭一以儉約爲式  
法此先嬪素所教訓然也不喜竒玩輿馬聲色



弋獵之娛嗜文學重經術斥左道絕外交善草  
隸亦不以示人恐人之知之也一不以名譽自  
居樂泉石之遊園林作小亭曰醉隱之亭冲澹  
蕭散每鼓琴自暢亦好古調不取世俗之音以  
王室尊屬 上禮遇甚隆王子謙畏益下如恐  
不克每受 上批 御札必下堂拜跪稽首如  
在 上前問疾必加朝服北向禮節益謹自居  
家孝友以至忠君敬上恭已盡節一出於至誠  
太常議謚曰孝肅茲惠愛親曰孝執心決斷曰  
肅及 孝肅大妃上號改謚曰靖孝寬樂令終

曰靖能養能恭曰孝

礪山郡夫人宋氏文端公寅之四世孫而郡守  
熙業之女也生二男二女長男朗善君侯次男  
朗原君侶二婿趙泰開李秀文皆士人又有側  
室女一人婿縣監尹敏聖其銘曰

王子夙夜小心畏忌謙退節儉以篤行誼先嬪  
有訓警戒不墜惟孝惟友以遺後嗣

公子生五歲 先王昇遐先嬪教公子一循禮  
法以故公子不喜芬華儉約如寒士好書手不  
釋卷善楷書深得 宣廟筆法不以示人人莫



知也公子韜晦不出雖一藝一善恐人之知之也常以河間被服東平樂善自勉也性嗜飲一不以縱飲失度公子以早失先王先嬪又不盡其天年爲終身痛聞入父母具慶者未嘗不嗚咽自悲長公子仁城君家流海島公子以攝主祭先嬪及其家赦還宗家既主祀而公子一以祭於家者助祀事事伯嫂其禮一如事長公子者疾病則必躬執藥物以養視諸姪如視子經亂後親戚之尤貧無依者賙恤不怠上知公子賢而好禮每有昏禮則必令公子主之稱

得禮公子嘗在厨院適雨甚上特賜御裝雨具以送之令尚方作鬃笠以賜之公子既受賜終身不易笠已丑上昇遐既成服居外舍不入內寢未卒哭雖蔬菜不御美味至誠如此公子有姊貞仁翁主早寡多病公子每往省寢食安則喜動顏色貞謹翁主早卒無嗣公子闕其嗣絕既窆泣言曰既幽明無負矣然後吾無遺恨云公子平生篤於經學心術之正操守之嚴亦可見於吟咏戲墨之餘無一散慢傲惰可謂篤行君子云



既作墓銘復追述其善行可識者著遺事  
上之十一年六月戊子陽川許穆撰

龜巖李先生碣銘

公諱楨字剛而姓李氏泗川人自初祖世芳至  
高祖彛倫凡十二世世舉進士號爲士族而五  
世祖穉又賢而以壽考聞於昇平世姜相國孟  
卿作壽瑞詩後世傳其事穉生彛倫以孝特聞  
彛倫生孟柱亦以善居喪鄉黨賢之孟柱生以  
蕃以蕃生湛湛娶鄭氏女生公於泗川之龜巖  
里公自幼時知讀書礪行圭庵宋學士以直道

斥不容於朝謫居泗濱公從而學焉學既成二  
十五擢第壯元初授成均館典籍後六年由禮  
曹正郎出守榮川從弟子列初見退陶李先生  
於陶山考滿觀察使上治績陞秩後以親老乞  
養爲善山府民有訴其妹抵死監司力主之公  
持其寃既不合輒棄官歸居三年先府君歿觀  
其葬祭居喪者皆以爲知禮服闋復居館職陞  
司成與李先生爲長貳於是庠舍學士多興於  
學藝明年出清州州境大治 明宗賢之又有  
行誼上聞擢加通政後入政院轉至左承旨嘗



歸省鄭夫人于鄉 明宗命廩給其家以獎其  
孝遷兵曹參議尋拜大司諫上書論治道累月  
出尹東京問舊俗修廢政又大修新羅列王墓  
其有功德於民者特祭之作西嶽精舍聚諸生  
講業於是蔚然稱東都之教入爲戶曹參議復  
出爲順天府首廢主多殺一時賢人名士殆盡  
寒暄金先生謫居於此卒以見殺玉川上有臨  
清臺後人悲之遺蹟在府城西公立景賢堂以  
祀之後年鄭夫人歿公已五十五哭泣羸毀又  
有 明宗之喪既居憂哭踊爲次服斬衰以齊

哀即私喪南海上人始知居哀服君喪之節  
宣祖之元年召爲副提學上書辭之仍陳勸戒  
幾千百言皆格言至論自是凡除拜皆不就於  
所居作龜巖精舍東曰居敬齋西曰明義齋日  
與諸生講學不倦學者稱之曰龜巖先生年六  
十而歿公自初筮仕至歿之年凡三十六年居  
補外者十九年或置散或遭哀去官或謝病家  
居者十三年立朝僅四年公之女有鄭斗撰行  
狀云端而慤寬而嚴好古樂善謹喪祭篤恩義  
可以居家可以居官可以教後晚而信道益篤



一以興學右文爲己任宋以來諸儒道學之書  
大傳於東自公始刊布云又所撰性理遺編景  
賢錄傳於世初葬於萬竹山南麓其後二十餘  
年有倭亂盜發之改葬於晉州之大洞子應寅  
孫虎變善學致譽仕爲軍器寺主簿其次鯤變  
進士以詞賦有名於時公歿七十年鄉人立祠  
龜巖以祀公銘曰  
君子之履常而道德之修彰生而矜式於一世  
歿而俎豆於其鄉俾後人聞風而作興其教彌  
遠而彌長

右贊成李公墓表陰記

公諱德沔字遠伯姓李氏本韓山郡人高麗末  
有門下侍中穡四世至我 成廟功臣韓城君  
墳生相國惟清相國生翊衛彥湜翊衛生木川  
縣監滄縣監生護軍澳相國長男觀察使彥浩  
生別提濡而嗣絕護軍爲後於太宗之世以功  
臣嫡嗣陞秩至從二品行護軍於公爲皇考妣  
驪興閔氏高麗相令謨之後而肅川都護府使  
元宗之女也嘉靖四十五年八月乙酉公生二  
十五選國子進士後六年冬庭試登乙科及第



薦翰林 宣廟知遇常在侍從光海時久居密  
直雖大昏亂之世能修舉中書故事嚴出納禁  
邪佞每因災異言土木寃獄事光海雖不悛猶  
知爲國無他意光海廢時公直禁中及兵入掖  
庭擾亂百僚跣匿而公公服坐堂上不避將士  
迫至 上前令肅拜公立不拜曰吾不知此事  
不拜 上後有數人目之拔劍擊之急舉義將  
金瑊李貴以身蔽之握手曰 母后幽閉國大  
亂此反正也 上定遠君之長子公宜拜之公  
曰諾即拜 上爲之起公跪曰願勿殺舊君因

泣下 上曰何爲出此言也 上既即位公首  
啓 上曰上以大義舉大事願以勿殺爲心因  
乞退以不能匡救舊君自爲罪 上賢之益尊  
寵賜資之甲申二十二年沈器遠叛伏誅 上  
內鞫罪人私屬辭引士大夫多無罪 上下其  
事時公爲判義禁不可曰有司職當鞫治內鞫  
非古事當封還 上旨大臣不從公因登對力  
言其不可以故辭引者得免死而明慎刑罰獄  
事無枉於是收孥連坐者除待年之律公案有  
力焉明年 上不豫以元孫微弱欲擇於諸王



子有一二臣忤意 上頗不快群臣皆曰如教  
公曰彼皆面諛也元孫名位已定人心屬望久  
矣一朝易置不可深思往古成敗之事 上優  
容而罷其年七月廿九日以右贊成卒享年八  
十追 贈領議政公莊重有德量常謙退不爭  
然至其臨大事正大義堅嚴雖有謂貴育不可  
奪也九月葬于高陽之巖山前夫人申氏之葬  
在右夫人故禮曹叅判湛之女有古賢婦人之  
德事舅姑能色養三十七歿既四十二年先葬  
故在右司議昌源揚口縣監光源修撰行源侍

直正源爲四男婿一人判官閔汝鎮而正源後  
夫人李氏出也又有庶孽子女五人曰由源曰  
希源曰世源鄭井源柳晚妻子孫至曾玄之世  
百餘人

瞻慕堂林先生墓碣銘

先生諱芸字彥成姓林氏其先本湖西之恩津  
縣人中世徙大嶺之南高麗時有爲朝請郎太  
常博士者諱成權林氏自太常始著曾大父諱  
千年宜寧縣監大父諱自麻父諱得善成均進  
士母晉陽姜氏先生少豪邁有氣力善馳射嘗



讀兵法去之反而讀孟子書通大義遂出入諸  
家既博學多通如星曆地理律呂筭數無所不  
究嘗從伯氏葛川先生講大易居家教人常篤  
於人倫必以躬行爲務鄉里化之先生年四十  
五而伯氏年六十二進士公歿哀毀不怠皆以  
善居喪聞觀察使李公友聞于朝 明宗命  
旌表其閭後三年以行誼薦爲社稷叅奉六年  
五改爲延恩殿叅奉齊祀益虔先生遊京師京  
師之人爭慕賢之名益重於京師先生在延恩  
之八月歿年五十六朴相公溥嘗饋藥先生曰

命也吾已病然大夫之賜也受而嘗之朝則沐  
浴剪爪正衣服而後以將死告于嘗所從遊者  
宋白川大立托以正終云計聞吊者大集既以  
禮殮歸葬中山其門人李偁著述其言行大略  
先生天資傑出卓然得聖人之旨勉勉孜孜於  
彛倫日用之則其所存者大常與人渾渾不見  
圭角及至處事臨利害截然有不可犯者皆可  
爲矜式與葛川先生並稱二先生云川上舊宅  
先生嘗作瞻慕堂之名故學者仍以爲號從川  
上入山中五里有蘆洞巖泉先生初有卜居之



志自號蘆洞散人其下又有回巖講學之所今古跡皆在先生娶星山李氏生承順承信承謹承厚承厚 宣祖十八年舉進士早歿承信生真忍承謹生真愆真愆 仁祖世為大君師傅今其遺風古德儒林學徒追慕不忘以二先生從祀龍門文獻廟銘曰博而專確而平嗚呼君子之成

茶山睦公墓碣銘

公諱大欽字湯卿號茶山姓睦氏本泗川人我山宗世有玄軒先生世稱以遺逸召不起事在

己卯事中生吏曹叅判詹事 明宗宣祖為名臣於公為皇考妣東萊鄭氏 贈兵曹叅判蹇之女萬曆三年二月戊寅公生少以詞賦致名譽二十七擢進士第二名後四年別試及第選入槐院尋移玉堂歷春坊銀臺 賜暇書堂後以天官郎兼知製 教冊使來為遠迎從事亦極選也壬子陞通政乞養為廣州其年鄭夫人歿既三年賀至如京師公秀而有禮華人見之嘖嘖曰賢大夫也何其習於禮也當光海政亂無意仕宦優遊散班斥落十年 仁祖反正例



降寺正仍復 賜殿書堂 賜賚以寵之明年  
李适作亂公為體相李文忠公元翼從事還為  
都堂舍人既賊平賞 扈從群臣公陞禮曹參  
議己巳都督毛文龍軍撥島以金兵犯蛇浦移  
怒於我將有變 上以公嘗為儼得其歡心令  
往解之公至則果大喜不復疑我贈文錦繒帛  
珍器以謝遣之既復 命請以餽遺諸物歸度  
支 上賜之家公既重於時為當路者所忌不  
復顯用也癸酉出為江陵以寬厚得吏民心去  
後其人立遺愛碑久而不忘云崇禎十一年正

月七日歿享年六十四公立朝三十四年三入  
至堂至校理諫院為正言吏曹三為佐郎政府  
為檢詳舍人太僕尚方為正政院至右丞旨參  
議兵禮工三曹補外廣州江陵公好簡嘿喜怒  
不見雅潔不以得失動其心於勢利泊如也少  
孤事大夫人務得懽心名其室曰駐景取古人  
愛日之義也治園林植花竹與伯仲二公怡然  
相樂於其中或醉則吟哦自娛口不言時事淑  
夫人柳氏籍晉州訓鍊院正海之女也有慈惠  
至性治家克順宗族歸心焉夫人長於公一年



先公十二年歿享年五十三合葬之墓在揚州  
金村東向之原公無子以從子行善為後公赴  
江陵之年登上第官至觀察使再娶而生四男  
二女男長曰宗儒次曰晉朝進士次曰昌期直  
長次曰昌明文科參議壻二人觀察使俞夏益  
士人鄭光圖其一男一女後夫人出也又側室  
子女三人男良善胤善壻申淑銘曰  
不訑訑於通不戚戚於塞不言而內植

大司諫睦公墓碣銘

公諱行善字行之別號南礪姓睦氏本泗川人

玄軒先生世稱之曾孫吏曹參判 贈領議政  
詹之孫戶曹參判長欽之子母貞夫人宜寧南  
氏軍資監主簿瑋之女公為叔父承政院承旨  
大欽之後其所後母淑夫人柳氏籍晉州訓鍊  
院正海之女也萬曆三十七年六月丙寅公生  
自為兒時不喜戲狎未成童已有成人器度文  
詞蔚然早成崇禎三年選成均進士六年擢甲  
科第一人初授成均典籍移禮曹佐郎兼記事  
官知製 教修國史忤用事者居散班久不遷  
丙子為兵曹佐郎移京畿都事觀察使尹履之



心器之方 上之大選才學之士以公薦之冬  
金人大舉來侵都城不守 廟社諸妃嬪王子  
皆入江都公臨亂處事多過人者人倚之及於  
當大亂殘破之餘畿內為左甚觀察使李湏曰  
此時無此人不可 啓請仍任專管賑恤事夏  
復為兵曹佐郎兼記事官轉司憲府持平俄改  
弘文修撰戊寅承旨公卒辛巳叅判公又卒服  
闋或在玉堂或在館職乙酉濟人令我從海路  
給軍食事期急公以獻納特差御史督運湖南  
餽餉還為副校理轉吏曹佐郎兼世子文學夏

復以副校理乞養為延安三年以修撰召還遷  
吏曹正郎尋改應教兼世子弼善己丑以濟用  
監正為謝恩書狀官如燕京還陞通政為兵曹  
叅知再為大司成禮曹叅議三為吏戶刑三曹  
叅議八為大司諫承旨己丑出洪州一年以疾  
歸癸巳為黃海道觀察使丙申復出尚州皆為  
養也洪州時患風痺病十年己亥以禮曹叅議  
謝病不復從仕在軍職三年其七月癸卯卒享  
年五十三訃聞 上遣禮官 賜祭賜賻如儀  
公敦厚有雅量未嘗疾言遽色臨事周慎不撓



於利害不營立產業以自累其居孝友皆稱舊  
家遺法云前夫人李氏故相文翼公德馨之孫  
觀察使如璜之女生三男一女男長曰宗儒次  
曰昌朝進士為伯父觀察使性善之後次曰昌  
期直長一壻叅判俞夏益後夫人尹氏掌令孝  
永之女生一男一女男曰昌明叅議壻士人鄭  
光圖公之墓在揚州治北伊潭村丁向之原與  
李夫人尹夫人同塋銘曰  
周而慎廉而仁不愆不玷以嗣其古人  
記言別集卷之二十五終

記言別集卷之二十六

行狀

慕齋金先生行狀

曾祖 贈嘉善大夫禮曹叅判兼同知 經  
筵春秋館事弘文館提學藝文館提學同知  
成均館事行奉直郎禮曹正郎諱統  
祖 贈資憲大夫吏曹判書兼知 經筵春  
秋館事弘文館提學藝文館提學知成均館  
事行通政大夫成川都護府使諱益齡  
父 贈崇政大夫議政府右贊成兼判義禁



府事諱

毋 贈貞敬夫人陽川許氏 贈通政大夫  
吏曹參議行通訓大夫寧越郡守諱芝之女  
公諱安國字國卿姓金氏平義城人高麗司空  
諱龍弼之後也 老純皇帝成化十四年戊戌  
八月六日先生生七年始學小學喜曰人事  
當以此為法學日就甫成童篤信程朱之學博  
讀經史通大義十七先夫人歿十九先府君歿  
為之廬塚三年其居喪之節哭泣之哀觀者大  
感 孝敬皇帝弘治十四年我廢王七年辛酉

監試擢進士第一人生負第二人兩製俱在第二  
一考官以為兩試元不可以一人為之下為  
第二後二年癸亥別試擢甲科第二人先生年  
二十六選承文院以通仕郎授正字甲子陞著  
作轉承政院注書兼春秋館記事官尋選玉堂  
為博士兼 經筵司經陞務功為副修撰兼  
經筵檢討官尋罷 毅皇帝正德元年丙寅帝  
遣徐穆吉時頌 登極慶赦公以遠接從事叙  
為虎賁衛司果兼知製 教尋為承文院校檢  
又兼侍講院司書我 恭僖初復入玉堂以宣



言言集卷之三  
教為副校理明年丁卯累加奉訓兼承文院校  
理秋擢重試陞奉直為司憲府持平啓 上曰  
自廢朝短喪之後人心忘親棄禮彝倫墜地請  
下 明教以樹風教戊辰遷禮曹正郎累加朝  
奉己巳拜司憲府掌令以言事遠為虎賁衛護  
軍尋為成均館直講改司導寺僉正轉成均館  
司藝陞朝散庚午為內資寺副正時公之弟為  
吏曹佐郎律令以兄弟之嫌不得遷官大臣白  
上曰成均教誨之職非某不可請毋拘以常例  
特授而專任之 上許之公復為館職為司成

明年加奉列日本使者釋弼中来公為宣慰使  
接遇有禮示以誠信弼中傾心敬之嘆服言曰  
我嗚上國使列國多矣未見如大夫之賢者也  
自此每日本使至必問公安否壬申加奉正其  
年弼中又來公復受宣慰之命而弘文館以為  
上方講易某不可出當遣代召還弼中乞留不  
已 上許之癸酉陞內資寺正正籍田經界乙  
亥大臣薦之為承文院判校嚴課漢吏訓讀習  
之法秋擢禮曹叅議改司諫院大司諫以言事  
遠為僉知中樞丙子為承政院同副承旨夏陞



右副承旨啓 上曰試蔭冗濫庶職不理依經  
濟六典每歲首令本曹同兩司試取其中格者  
出榜給牌時有魯山燕山立後議 上問之公  
對曰二君雖當廢序親則皆係於 先王况既  
皆君臨一國死而無所歸其孤塊厲氣足以召  
沴 殿下繼絕立後之意甚盛德大臣持之臣  
切惑焉請更收群臣議考其碩立後古事斷而  
行之又曰治道以孝弟為先而其教之之方莫  
切於小學且 先王既撰三綱行實以教四方  
請加長幼朋友為五倫行實廣布中外 上憂

人心日偷爭訟不息欲立限以防之公曰立限  
亦末也敦行教化使民俗歸厚則爭訟  
自息矣 上深然之丁丑陞左副承旨尋加嘉  
善為慶尚道觀察使兼兵馬水軍節度使 下  
御札曰慶尚大於他道必擇其人雖官序不次  
特遣之公為政必以教化為先搜訪孝子節婦  
皆旌表致禮饋遺加厚有行誼者皆存問禮接  
玄風縣祭寒暄金先生墓鄉人有兄弟爭訟者  
公諭以孝弟之義其二人慙再拜裂券而去公  
嘗陞辭請程愈集說小學者刊行之又撰二倫



行實諺解呂氏鄉約農蠶等書皆刊布閭巷州  
縣學校皆作勸學詩以勉諸生相儲澤穿渠廣  
開水利庇安縣有相公堤嶺南湖西租粟委輸  
可與以為漕轉之路久矣公會湖西按使條列  
便宜驛聞於朝置可興倉戊寅以同中樞為謝  
恩副使如京師 上特加資憲拜禮曹判書既  
還進所購朱子大全語類論語孟子或問延平  
答問二程傳道粹言張子語錄經學理窟胡子  
知言丘濬家禮儀節及古今表選等書請刊行  
廣布冬蕪知 經筵同知成均館事己卯拜議

政府右叅贊蕪弘文館提學夏改知中樞蕪全  
羅道觀察使及陞辭 上慰之曰全羅號為難  
治特遣卿耳冬士禍作大司憲趙光祖等皆竄  
逐賜死而公亦坐罷公因退居利川構小亭曰  
恩逸亭日與弟子講論經學學者日進用事者  
疾之欲抵罪公不動講學如故戊子移築梨湖  
別業在驪 亭曰泛槎亭有梨湖十六詠堂曰  
八怡堂有草堂八詠每鄉人父老載酒來餉必  
暢飲逍遙如是者十九年 孝肅皇帝嘉靖十  
六年丁酉用事者敗公起為上護軍蕪同成均



戊戌改同敦寧仍兼成均館事尋以知中樞拜  
禮曹判書秋復為右叅贊明年春詔使華察薛  
廷寵來公為館伴有酬唱詩一卷夏以知中樞  
復為右叅贊嘗侍 經筵白 上曰取士之法  
必講四書三經用力分而功不專依朱子議每  
式年適試一經比中國專經之制尤詳盡冬加  
崇政拜判中樞兼知義禁 世子賓客尋復為  
禮曹判書特改大司憲辭為知中樞復拜禮曹  
判書又特拜大司憲力辭復為知中樞俄改判  
中樞尋以漢城府判尹復拜右叅贊陞右贊成

兼弘文館大提學藝文館大提學 世子貳師  
辛丑夏大旱 上召公卿大臣令各言事公對  
曰己卯被罪諸臣未蒙 恩澤其他凡在囚籍  
當宥者如 祖宗古事令大臣會議疏釋尋特  
改兵曹判書秋遷判敦寧冬復為禮曹判書壬  
寅復兼 世子貳師公固辭不就夏因 世子  
上請 上令入書筵講易公辭曰臣嘗為貳師  
其禮 世子下階迎之臣既在貳師之職雖僭  
越臣固不避今已適其職 世子儲君臣不敢  
當此禮 上令從賓客之禮公又辭曰 世子



既以貳師禮待臣今以賓客之禮則是前後異  
禮禮不可變臣亦不敢當此禮 上曰禮不可  
變宜從貳師之禮累辭 不許又兼五衛都摠  
府都摠管夏日本使者安心東堂來其書多不  
遜公以禮責讓之嚴飭前立約條以答之又建  
立漢吏科制有四方之士死於國學者令漢城  
府適送其柩定為律令冬以疾適為知中樞  
上遣醫問疾賜御藥 世子亦遣宮僚問疾俄  
改判中樞又辭適都摠管公在告數月疾益甚  
時 帝以掖庭有變因不豫罪人既得天下皆

賀大臣以為公既有疾令提學草表公曰吾職  
也遂自製疾逾劇癸卯正月四日也公掌文衡  
四年凡大國表奏雖有諸學士一不以倦故屬  
人而自暇及疾病亦如此門人許判書磁尹叅  
判漑請問曰公常任國事為憂欲有言乎公作  
氣言曰國事國事而語未了矣 上欣遣承旨  
問疾承政院以為非三公遣承旨無古事 上  
特遣之至則已不能起對但曰臣不敢負 聖  
恩死遂卒訃聞 上罷朝二日贈賻有加百僚  
皆會哭自門生弟子以至太學諸生皆變服哭



吊至於閭巷小民皆出涕公資稟既厚充養既  
積粹于面盎于背者劉而不厲直而有容溫恭  
篤厚樂人之善耻人之惡諄諄善誘使人油然而  
感發其良心教人而人易從責人而人不愠當  
官處事推其至誠殊俗亦化自十五六時慨然  
有求道之志及見寒暄金先生得聞聖賢之旨  
樂而忘寢食以為君子之道不出於日所人事  
之則委曲的當纖悉無遺人或疑其煩瑣公口  
常入心麓聖人心細安事捨精而趨粗以為通  
乎司馬公自言平生所為無不可對人言者又

有以日之所為必告於天者一事不可忽既規  
模廣大節目備具如屬廢墜無問巨細必究不  
原以達條緒使不泥於古而必宜於時國家古  
事中國典章凡可以推行者每臨事必舉疊疊  
不已常觀經濟六典以為祖宗良法美意盡在  
此有守信田乃備朝官寡妻廩給不乏改撰大  
典取為職田殊失 祖宗忠厚之意常病漢吏  
訓學不一欲遣子弟入學中國事竟不行每晨  
起整衣冠端坐對卷終日未嘗少懈常嘆曰東  
方風氣偏薄人稟不厚成德者少教人各因其



才而篤之以變化氣質為法庭前穿小塘引水  
觀魚嘗於中夜聞魚躍有聲喜曰大小雖殊自  
樂則同靜中有動是吾所樂也一時謂公曰周  
盡如陸敬輿精約如呂晦叔超妙如蔡季通云  
公早失父母居處飲食終身寓慕祠堂傍築小  
齋居之名其齋曰慕齋有姊妹窮乏者與之同  
居廩祿共之自奉儉約調急必厚常戒子弟曰  
我平生未嘗以傲惰加人亦未嘗言人之過汝  
曹宜戒之有家訓八條一忠君二孝親三友兄  
弟四睦宗族五處鄉黨交友六慎言七謹行八

居官六事公春秋六十六其三月廿九日以禮  
葬于長湍海村先塋之次太常易名曰文教道  
德傳聞曰文夙興恭事曰敬配享 榮靖廟庭  
諸生立祠驪上以俎豆之貞敬夫人李氏宗室  
松林君諱孝昌之女公卒後十三年卒享年七  
十九生三男一女長男有孚典設司別坐次汝  
孚議政府舍人次在孚活人署別坐女適副司  
勇姜復有孚生二男長男堯命掌隸院司議次  
堯選察訪汝孚生一男一女男堯叙縣監堯壻趙  
誠縣監在孚生一男一女男堯錫進士壻復興



守姜復生一女一男女適典艦司別提許糧男  
司諫院司諫克誠外後孫陽川許穆謹狀

觀雪先生行狀

曾祖正憲大夫吏曹判書兼知 經筵事五

衛都總府都總管 世子左賓客諱磁中宗

仁宗明宗乙巳獄事蔓延公力  
言之忤用事者付處決原卒

祖典艦司別提宣教郎諱糧以行誼除官見  
任判書說任公

曰名利之途口汚潔  
身者耻之公即棄官

父成均館進士諱亮 早世

母永嘉權氏父諱以中母上洛金氏  
成均館司成冲之女也

先生諱厚字重卿姓許氏本湯川人皇明萬曆  
十六年我 昭敬大王二十一年十一月戊辰先  
生生于漢陽之彰善坊明年二月先府君二十  
七歿先生生未三月先生穎悟嗜學為兒嬉戲  
為尼父教弟子習禮容之事比長篤於行誼事  
諸父如事父能飭勵自立十五初見南士金暹  
生得聞修己之力大悅師事之後金暹生死為  
之心喪三年初問學於權寺正用中後受易於  
張彥忱先生晚而從德信正傳大學口訣經傳  
要解成寺正先生母權夫人之叔父而學於履



素齋先生先生所與遊如師心李挺豪趙龍洲  
綱沈司諫大孚晉陽姜鶴年李洪州命雄先生  
嘗稱之曰英彥之篤實日章之簡潔子久之清  
苦信叔之方嚴挺而之劉果皆以古人求之晚  
與申翊亮君輔心相許當光海時隱居原州樂  
遊各山水登臨東岳南遊見寒岡愚谷二先生  
歎曰三代氣像在此從弟穆嘗問學力何事先  
生曰惡衣惡食與人居而不耻嘗論天人之際  
曰自動靜云為之則天地萬物位育之妙可推  
而見也癸亥我 仁祖既反正李文忠公元翼

薦其賢初授內侍教官先生上宰相書言前時  
佞臣當國以為 宣廟功高而廟號不稱貶議  
者舊以祖易宗此非所以事先王也賊害忠良  
竊弄大權蓋由此益專當時人人重足反目不  
敢一言今王業中興罪人伏誅小大更始非宗  
貶於祖也於禮大不可仍崇舊號慰先王陟降  
之靈此而其時事重禮嚴為大臣之責也丁卯  
有虜變 上出幸江都大召四方兵勤王原州  
士大夫謀舉兵推先生為將時金公昌一去陝  
川卜居寬川年八十先生曰金公長者且有重



名雖老将非其人不可士大夫皆曰諾先生為從事金公落落好氣槩不事小節約束軍中先生不從其指畫金公怒罵曰腐儒不可與議事也先生從容言事反復盡之金公即改之退而私歎曰賢乎可謂一世之真儒也賊退賞諸義兵公為濟用監直長辭不就其九月有李仁居事初仁居入橫城山谷中躬耕而食中興初召除官不起先生曰其所為頗僻必傷風敗義之人作詩諷之後仁居以犯逆誅而詣告引者皆死獄事急先生為罪人所指名亦被逮而使

臨門大夫人歿既就命 上感之知無事命釋之其十月以喪歸早寒江水冰合旅葬斗嶺居廬大江之畔每朝夕望塚哭江樹為枯其居處戚容觀者大悅祥而返於是與李英彥丈講喪祭變禮既除喪復為內待教官三年為司道寺主簿掌供上當大小陵夷一循古事癸酉為砥平縣監臨民以公明慎三事為要為政先嚴而後寬自兵革初定流民未集量田減半當時國家無事已數十年加墾田什倍而不屬於地部亭為列邑私稅先生計田稅入以寬民力時邑



有內奴以勢力為民害者積十年守令莫敢呵  
先生數其犯禁者十餘事以法殺之民情大悅  
而以此繫經冬夏邑人守闕訟寃適天旱以寃  
獄得釋返于原州等小齋居之號素庵嘗有惺  
齋遜溪之號遜溪在雉岳西丁丑為宗廟署  
令不就後月為義城縣令大亂之後南方小完  
於是問古事修廢政務畜積鍊戎卒嚴條約禁  
豪強糾其不從令者右族多不悅四年罷寓居  
昌樂觀白雲洞登臨小白山癸未以東宮翊衛  
送世子北行後世子返為衛率乙酉為刑曹佐

郎丙戌為戶曹佐郎皆不出丁亥為戶曹正郎  
戊子春為恩山縣監頃年有上變事亂者多出  
於連山尼山恩津境革其邑初置恩山縣時用  
事者多數縣人列邑爭卑事之有以禮節倨傲  
誚先生者先生笑曰恭而無禮君子恥之我欲  
行禮以我為傲不亦異乎明年罷辛卯為刑曹  
正郎當仁廟禪事入謝即歸昌樂其冬徙原  
州南觀雪村因以為號後為司僕寺僉正宗  
廟署令皆不出甲午為繕工監僉正乙未復為  
翊衛丙申二月為工曹正郎五月特拜司憲府



持平上疏辭之。上批略曰：劉方正直聞之久矣，朝廷不用而予特用。云九月陞掌令，辭去。或曰：當言責可以言而不言，何也？先生曰：無益強言，要名吾不為也。戊戌為通禮院相禮，不就。即除淮陽都護府使，不赴。五月復為掌令，當路者忌之，罷其十二月。為安東大都護府使，又不赴。明年為尚衣院正，不就。冬當孝宗之喪，除掌樂院正，即出謝。又謝病。庚子冬，先生寢疾。正月從弟舒死，為之哀戚不已。時苦寒，居位哭，既殯疾愈劇。二月十日歿。前日令侍者理髮更衣朝。

則恬然正卧而歿。是日晦，冥大雨，川澤溢。先生年七十四。其年十月乙酉，葬于麻田郡治北二十里，窆幕里之東南。與後夫人趙氏同原。而夫人之葬在後。嗚呼！先生之學既博而約，既備而簡。蓋其尋常處事儀則之詳，可見其道大德成而微言絕。行知者蓋寡矣。立心以無不敬始，而繩墨嚴切。知則必行，行則必信。積行六十年，至於義益精，仁益熟。其道成於彞倫，日用之間篤於宗族，忠於交友，推至於仁民利物之大，而又如禮義田賦、兵律、刑書、天文、地理、陰陽之運化。



無所不究能不懼不惑先事見幾處亂世而患  
害不及焉教家臨民以嚴為主嘗曰令行禁止  
然後治體可立御下不以察察為明臨事不以  
小利害大義取人不以其所短掩其所長每事  
一從大與曰一世之治有一世之制執事趨事  
時王之制不可不從也穆曰苟無以利一為心  
庶幾免恥辱先生曰亦末也書曰直哉惟清事  
直則清自見遺其本而循其末不幾於為名乎  
見世道日亂絕意仕進每對學者極言近世為  
學之弊不越乎貌言動作之末而求其心則一

出千名要譽之私而終不入大公至正之道眷  
眷以淑人心扶世教為心官在下僚或出或不  
出而及大臣薦之至於顯用終不出而仕也所  
著述以性命天人之本禮樂文物之備人物古  
事之則治亂興壞之迹四方土物之宜以至百  
家衆技閭巷風謠凡累數百軸頃年家失火書  
皆不傳穆哭之曰世道日喪又失耆老使後死  
者無所考德而儀式其純粹之學絕倫之識自  
天地人文之本達之萬事萬物之宜規模之大  
節目之詳可謂曠世之弘儒偉才而能知微知



彰先事見幾穆學而未能也直而寬儼而和恭  
而能恭穆學而未能也嗚呼吾道已矣使斯人  
窮歿於此世者天耶命耶時耶先生初娶完山  
李氏生一女而李氏歿後娶漢陽趙氏生二男  
三女男翼翼是翼好讀書早有聲譽先生教內侍  
之明年長女死翼又死又明年趙淑人歿二女  
適申曼宋孺徵皆名家子又一女未笄先生寓  
居昌樂之八年感風土無病而死又有側室子  
男女三人從弟穆謹狀

黃徵君行狀

先生諱宗海字大進姓黃氏本懷德縣人高麗  
時有閣門祗候吉臣於先生為七世祖祗候生  
尚文皆以科目著其後有直長彬直長生鐵均  
有文行祿仕司判義州判義州生國子生負友  
參亦以篤孝稱生負生宣務郎潤琳宣務生德  
休於先生為皇考有孝友至性稱隱德云妣昌  
寧成氏高麗政堂文學彥信之七世孫而八十  
孝友參奉羽之女也萬曆七年三月廿六日先  
生生性至孝幼未始知學能知事親之節見之  
者皆嗟嘆之以為孝兒云生十年始有志古人



之學十四五以學藝聞二十四初事鄭寒岡先生得聞為學宗旨丙午先府君患風痺病八年歿泣謂曰吾八年之病兒保養我色憂未嘗惰容亦八年我死恐哭之傷生死不瞑目云既歿五月未葬食粥寢地哭不偯扶而後起既葬守塚三年食蔬食飲水不食菜果其居喪之節有寒岡喪制荅問既除喪有以酒食饋慰者先生不受曰云云庚戌作金濯纓行狀辛亥與兩湖諸生千餘人上疏論鄭仁弘詆誣前賢壬子仁弘入為相行過木川縣有媚仁弘者召諸生欲

迎謁來聚者且數十人先生曰前年諸生上疏罪狀此人復事干謁其無愧乎諸生皆謝去癸丑光海閉太妃於正宮先生曰人道滅矣遂廢舉不出也丁巳作退陶先生山居詩跋戊午至連山見沙溪問禮有禮學疑難荅問壬戌陶潛洞卜居成癸亥仁祖旁求文學縣以先生行誼上聞未止有張公維已薦於上矣明年成孺人以天年終先生將五十哭泣居哀之節不以衰故小變既葬而返哭居堊室去墳墓且數里每晨則哭於墓一如居墓之禮讀喪禮有



沙溪疑禮答問乙丑作讀書錄要語續選跋丙寅沙溪以章廟追崇非禮將上疏問於先生先生據春秋閔文襄哀事以答之又著論言追崇非禮戊辰張公維白上初授厚陵叅奉不就己巳作家禮剝解跋庚午以書問旅軒竹林書院濯纓祠堂兩祠享祀節目時睦公叙欽長欽交薦行誼壬申張公維又白上拜童蒙教官不就甲戌崔公鳴吉睦公叙欽白上曰某守道林泉不求聞達拜英陵叅奉不就乙亥作陶山言行拾遺寒岡五服公草圖跋又作

比豐門規祭儀墳墓敬宗睦族各有考證通論丙子拜齊陵叅奉不就冬有狄亂有兄年高先生亦已老逃亂山中食則執饋行則執轡曰亂中兄弟不相離也丁丑作禮詩九章其一事親其二教子其三君臣其四夫婦其五兄弟其六事師其七長幼其八朋友其九總論推行五倫祖述小學而成篇者也戊寅東方善行謏聞木嶽古事成己卯作心性情理氣說庚辰朝廷特叙六品為掌范別提不就作村規凡例從藍田鄉約因俗損益者四十六條作儆民篇序又



作門中完議論次嫡承重祭田墓田事也壬午  
十二月廿四日先生歿年六十四貧無以葬遠  
近士爭出財力共葬事門人趙惟顏安汝龍金  
光勳掌喪禮明年三月葬于邑治東三生洞德  
泉之原先塋之次穿墳三尺下得古器有文曰  
德泉故仍以名原後八年以先生從祀竹林書  
院先生既親炙大賢之門篤信好古勤學積行  
其學一以孝悌為本其居家篤行信於鄉人祭  
祀有法亦不以昵加豐祀禮主嚴祭妣不祭考  
有主宗祀者雖與之降等見之必禮貌之曰尊

祖之禮當如此與兄弟一主恩愛教家必以箴  
怒宿怨為戒子弟有過亦不加呵責諄諄然警  
之令自悟也與人交必忠必敬有不善必言其  
有不改者自反曰言不信吾過也必以誠意自  
勉先生素多病日必晨起盥櫛衣冠而坐居處  
必嚴嘗樂稱論語有若無實若虛犯而不較曰  
一生服膺在此云平生非其義不為以潔其身  
所居從林壑之幽吟哦閑暇自娛廢舉三十年  
經術博覽尤深於禮學又如百家之語醫藥美  
數之末亦無所不究學益博行益修自守愈謙



教人必先小學孝經次及四子學者稱之曰朽  
淺先生朽淺其姓鄉古號仍以自號者也其言  
行雜記曰先生素善酒少時嘗醉墜馬一受先  
府君之戒退自責終其身未嘗飲醉而忘其戒  
先孺人已老令諸子分產業治生先生必取薄  
田老奴曰財易得兄弟難得孺人疾病思食柿  
以忌不進至老不忍食柿遇忌日必繫中素服  
終日不與人坐其哀戚一如居憂之日至今里  
中父老相傳先生母病嘗糞漚血拜北辰事以  
為新定善行古事云宜人李氏我 太宗七世

孫也父弘璧以善行特聞為一時士所推許老  
也母晉州鄭氏中古名人承旨誠謹之四世孫  
玄軒先生睦世枰之外孫也內外皆名門法家  
宜人有至性事舅姑亦以善養稱萬曆十年九  
月三十日生先生歿二年宜人歿六十三附葬  
同原有二男鵠立鶴立進士壻士人李堪  
鵠立生載厚履厚命厚鶴立生道厚壻李淳熙  
又有二男二女幼有朽淺遺稿五卷又有言行  
錄

茅溪文先生行狀



先生諱緯字順甫姓文氏本丹城人其中世居咸陽自三世祖雄始居居昌皇考諱山斗賢而有禮不得見於世而鄉邑子弟往往能知禮節事父兄者多其弟子云妣咸陽吳氏嘉靖三十三年六月癸未先生生六歲始學書九歲受尚書通大義始弱冠觀禮於南冥之墓因受易於德溪後從寒岡鄭先生得聞聖賢之旨樂勤苦力行名聞南州我 昭敬中有倭寇王圻既陷國內大亂諸義兵多起於是先生募鄉邑子弟屬義兵將金沔沔習兵事雅信愛士士以故

多趨之其明年軍中大疫主將死先生任後事益辦而能盡軍中喪主將之禮士衆歸心其五月其夫人歿後五年十月先生歿時南方兵革未平當大亂之際禮道壞缺而凡葬祭持喪之節觀其禮者愈益賢之既卒哭築室茅溪教授十年弟子稱之曰茅溪先生有宰相柳成龍副提學金字題交薦之 昭敬末除童蒙教官以曲禮弟子職立教條以率生徒一時化之四年遷繕工監主簿尋轉監察後年光海新立鄭仁弘用事而臨海獄事大起於是鄭先生為大



司憲右全恩之論既斥逐而大臣杜門先生曰  
不去禍且及矣遂棄官歸自此士大夫恥之稍  
引去其後 大妃幽閉王子貴臣多僇殺卒有  
癸亥之敗弘陝產假名儒術遂得專用其學忌  
克慘礪戕賊恩義傲蔑前古以亂一世其弊唱  
於江右風俗大染於是先生屏跡自守講學不  
輟每對學者極言義理邪正之辨以淑人心扶  
世道為己任時有弟子趙漫者以布衣抗疏陳  
倫紀得罪流海島而先生竟誣以誹謗坐禁禍  
機叵測猶晏如也噐噐而樂義 上之初在牧

用雋賢先生為高靈縣監見時好頗引左道嘆  
曰自此道益衰矣卒去歸時有賢公卿薦於  
上前者而時議老之亦不召崇禎四年十二月  
壬辰先生卒年七十八疾病屏婦人正衣冠遂  
以歿君子以為正終明年二月庚寅卜葬于加  
祚縣多發山南麓先生天稟高邁早有求道之  
志日遊諸君子之門積學躬行得之於心而晚  
而益成其粹於面盡於背者和而毅直而寬恭  
而有禮隱不遺世窮不失義樂而忘憂亦足見  
君子之盛節也有所著座右銘自省篇先生初



娶李氏無子次娶朴氏生誠後能以善行聞末  
娶慎氏生敬後忠後皆且志學女一人嫁新安  
羅以道側室又有子女皆幼

洛川襄先生行狀

高祖中郎將諱仲賢

曾祖上護軍諱孝孫

祖副司果諱純

父叅奉諱嗣宗

母密陽朴氏

先生諱紳字景餘姓裴氏本京山麗末有中郎

將用臣始告玄風於先生為五世祖也明 武  
宗正德十五年十二月己酉先生生七歲學於  
同縣金捌八歲從嚴漢卿學學日進號為奇才  
嘗出遊途上遇一邑宰捧擁呵叱行過群兒皆  
畏匿而先生端拱立宰心異之之既就館召與  
語為之禮貌而嘆曰他日兒當作大德君子識  
其姓名而去十七選解額鄉里皆賀先生謝曰  
吾人事業豈止此也嚴家富饒多義人見先生  
守禮甚嚴欲試之解其紛挐之冊間先生覺之  
辭主人曰讀聖賢未能行其事而汗其書請去



其美人大慙嚴謝之初受學師金掬遘厲疫殆  
死闔家皆染先生躬日夜執藥物救而得全後  
金病且死為書戒其子托先生曰以此付吾兒  
而且教之也謂其子曰斯人者吾所畏也若以  
事吾者事之其子事先上甚敬世以篤行聞先  
生既弱冠初見南真先生後從李先生於陶山  
得聞古人之旨學既通與金範李濟臣講諸生  
序齒之禮曰太學禮義相先之地而長幼無序  
無義時李忠正公為大司成心善之知館事成  
世昌難之曰孔子之門有此禮乎太學生洪仁

祐曰有之四子言志曾點最後對朱子曰以齒  
則曾點當次對而以鼓瑟故最後成無以應然  
自己卯之後士以言禮為戒事竟不行洪仁祐  
以學問聞每推許襄景餘之篤實云 恭僖末  
在太學不樂歸其明年士禍作 世宗嘉靖三  
十一年先府君歿時喪禮大壞殮殯葬祭一從  
朱文公家禮居廬以終三年後十年以朴孺人  
命應舉成進士後四年以公薦除南部叅奉明  
年移慶基殿叅奉尋改 敬陵叅奉以親老歸  
復除慶基殿叅奉不就 穆宗隆慶二年先孺



人歿既三年為冰庫別提又不就方 昭敬初  
政專用儒雅以為養士之道莫先於教育蒙士  
選學有經術者先生與禮安趙穆首膺是選為  
教官先生本為親屈也自先孺人歿不欲復出  
而仕也以除命再至欲謝命而歸鮪齋草堂諸  
公勸之仕先生教授生徒必以小學為先辨其  
音釋正其句讀優游探賸使自得之循序漸進  
不許躡等座右書九容九思使學者常目之曰  
為學必內外交修不可偏廢先生居處必嚴動  
作有儀人自畏敬得於觀感者尤多於是學者

全集至累數百人從學之士皆步履有法言不  
苟妄不言可知為先生弟子也有宰執憂子弟  
慢不率教者責令就學數月其子弟循循雅謹  
戒飭祇畏其宰執歎曰苟非躬行篤敬安能感  
人如是神宗萬曆元年冬先生寢疾彌留日猶  
寇帶必飭不改常度者半月日而歿十二月十  
七日也先生年五十四先生有故人曰文德粹  
從仕在京城來問之執手曰疾已病矣死而屬  
妻子朋友之責也母念先生曰死命也吾豈為  
兒女子為憂既歿自朝之賢士大夫以至韋布



士凡所與相識莫不涕泣相吊歸衣服以燧明年正月孤子瞻以喪歸後月廿七日葬于高靈縣鳳翔南岡先生娶孫氏女生二男三女男瞻瞻瞻生繼緒以行誼為 恭陵叅奉繼緒三男後迪後度後洵瞻早歿婿三人安士信鄭仁洽郭永鎮仁洽生貞先生資稟卓異自髫髻慨然有求道之志常謂為學之方不出於窮理踐實扁其室曰景齋每對卷終日揭聖賢宗旨以自勸嘗讀大學誠意章下朱子審幾之說歎曰此舜跖之分於此不察頭緒茫茫無所用力其居

家之節内外有禮昆弟克順以事父母篤於親仁忠於交友言必信行必敬不以小節而或懈不以幽暗而或肆對學者每以安肆逸欲為戒又曰學者於勤苦中須覓無限意味與鄉人處未嘗一言及於時政聞民感則若恫瘝在己有君喪必不食肉三年曰君親之義事之如一喪三年食甘脆不安於口也喜讀易文章瞻麗有法蓋得於問學者然也作南真先生實記松溪行狀先生居洛上學者稱之曰洛川先生南方學者郭趨朴惺皆弟子也趨黃石之敗守節死



之時東方大亂尚慶以南陷倭七年先生所著  
述甚多而書皆亡不傳於世先生歿九十餘年  
立閭表碑後學陽川許穆撰

崔達夫言行記

君諱繼昌字宗叟後改達夫君聰明強記才識  
過人少從石洲葱山始知名吾與君俱學於葱  
山君與吾同年生且同里子吾魯鈍而君卓然  
早成二十時與吾論天理人欲雖不深得聖人  
之旨其見頗高相得益深日商論古今明於是  
非邪正之變資以為學吾退守而君勇往能立

不撓吾自以為不如君嗟乎石洲之禍最究其  
客多畏禍不敢問君能辦其喪又能經紀其家  
葱山沒而家屬無依漂泊失所君主其祭祀終  
身不衰君嘗娶李氏女早死其家不忍其女之  
歿而又賢君之行義視君之衣食服用不以亡  
女而或衰石洲家既托於君甚厚君受其主夫  
人之命娶石洲女為妻石洲有穉子今縣監沆  
時尚少兄事君君亦視之如親弟吾嘗訪君於  
西湖君為我誦石洲瓠尊詩終日言石洲事相  
與悵然久之沈器遠者初事石洲其人好氣立



然諾傾人君心不取謂余曰彼非端人好任俠  
視一世為無人他日以此人之故禍人必多亦  
且不免矣後其言果驗其識人之明類此君好  
言論其言多警俗悟人吾常不忘君嘗與人言  
其人不可必以詼諧折之去則笑之曰此處亂  
世之道也嗟乎君二十六死君志高而行潔為  
文章長於詩其筆法尤嘉君初喪妻卒然無病  
兩脚如死經年不起忽發狂起立走去因得無  
病夢有一老翁告之曰以耳視以目聽君覺而  
思之曰以此尺此世足矣此鬼神教我也因自

號目聽嗟乎此其不壽之屯耶何其恠也庚申  
九月吾遊南海上宿於逆旅夢見君依然悽愴  
未久聞其死吾與君交歡如骨肉兄弟當死生  
大變必有相感此為永訣耶良為慟惜吾於此  
世如此友者幾何辛卯孟夏日至節眉叟書

李令人行記

令人故戶曹佐郎李玘之妻也當兵革之世主  
君為官嶺內管軍食在兵間及官軍連敗賊大  
掠州縣令人不深入山中曰若主君不幸義不  
可獨全夜則禱于北辰以祈主君之幸及事平



主君因違疾彌留且十年令人心憂苦夜不解帶凡服食之宜醫藥百物日供具不乏皆令人至誠致之及卒不救令人晝夜哭吊者大戚既葬廬于塚傍躬執饋奠雖已老未嘗一事委諸卑幼身不脫衰寢不設席飯蔬食飲水為之六年不除親戚以禮寬譬之令人曰我未死情不忍遽變每上塚不避風雨隣里不忍聞其哭聲而雖幼兒不敢以遊嬉居其側既除喪猶蔬食疏布衣直履哭之如初羸毀數年而歿令人故相國李山海之孫忠臣李希津之外孫也幼喪

父母外祖母某氏鞠之及歿為之心喪三年以報之治家有法事舅姑有禮撫婢僕詳而不勞凡親戚有喪篤於相救善乎賢婦人之德非獨烈女之行也平生至性善行皆足為婦人之矜式而為女中君子云令人有二女子其一人咸豐李之濂養而之妻也

李兔山家狀後記

李公直故持平李公性源之次子也性恬靜端重慈祥敦厚中心嗜善恥不善若浼已自居家事父母處昆弟與朋友交以至任職居官一也



少於我十四年吾甚敬之平生口不出鄙俚之言身不設惰慢之容行必避苟且之跡晚年為數縣以簡潔聞兔山時去老人居不百里問其居官服食如家居多病莅事必勤一不以疾廢事曰吾職也其門屬與老人接隣居者數人家貧無以自育必推其佗給之餘恤其寒餓至誠如一推此一事亦其他可知也先持平公篤行孝友立朝方正鄭愚伏稱之曰出群之標平正之言於今之世吾見李持平一人云公直之賢蓋有自也歟在世友許穆眉叟記家狀後

遺事

上洛君事

昔壬辰之亂 上定西幸之計用大臣言分遣諸王子臨海君往北關故相上洛君金貴榮從之順和君往關東長溪君黃廷或從之及賊入關東順和君趨北關會臨海君賊追躡之二王子窮迫至會寧北道節度使韓克誠南道節度使李瑛拒戰臨溟驛連敗於是兵民皆叛縛二節度使降賊諸郡縣爭執長吏以迎賊會寧小吏鞠景仁等縛王子諸宰以降賊得之解其縛



置軍中為質上洛君在賊中竭力圖出王子謀  
既定王子聞之謀及婦人牽連泣持機會已失  
賊疑之出行中丁壯盡殺之守之益密逋世翁  
雜記曰然上洛君日夜為謀而力不及也清正  
聞行長敗於平壤大懼為書通令王子大臣皆  
署而以判官李弘業嘗為近臣可遣約和弘業  
曰不可以此書往賊怒待王子益急上洛君私  
謂弘業曰事已迫矣可行矣賊書固不足說幸  
而得達行在所則上必引見賊中虛實事機  
緩急可畢陳上前因此遙制賊勢圖出王子

樂會不可失也善為之弘業既還得罪後賊以  
為上洛君大臣必大臣生和事可成乃迫遣之  
癸巳春上洛君來自賊中謁上於行在所  
上怒曰方被執時既不死乃反賚來賊書諱不  
以上欲拷問之大臣皆曰不可竄熙川道病卒  
議者以為當死而不死此不然賊連陷三京國  
大亂乘輿播遷於是分遣諸王子以圖邀幸  
其萬一方大臣之受命也上之所托屬王子  
也大臣亦以身許王子矣事至不幸若王子死  
則大臣義不可獨生王子不死則大臣無可死



之義也

李相國遺事

漢山李相國呈陶山李先生四韵詩數篇傳於後世而陶山酬和詩皆親筆跡俱在不但古君子遺篇遺墨亦訓戒寓焉後學之士思一言不可忘一字不可遺雖百代之下寶蓄而珍藏之宜矣相國之賢亦聞於後世者也博學為文章以文詞進常在三司 恭憲王十八年有改正宗系事奉使臣金澍客死京師 帝許使事而公初以都堂檢詳為書狀官以從以奉使者死

公奉勅還至國 上多之陞拜戶曹參議及上登遐大臣受遺命迎立 昭敬王時公為都承旨其年為嶺南節度使仍為觀察使又為湖南關西觀察使治績居多入為大司憲吏兵刑二曹判書兼大提學以贊成陞拜右議政賜光國功臣號封漢山府院君以正宗系事也後三年有倭寇 上西狩而公以故相留都募三輔丁壯與寇戰於洪福下克之遂復相為領議政時寇連陷三京官兵皆潰 車駕急聞朝廷有內附之議喟然嘆之曰國事無可為也不食八



日嘔血死之相國年六十七性忠厚嗜古以  
好善事君至於貴窮公相亦守死善道可謂君  
子之善終者也相國諱陽元字伯春 恭靖王  
之六世孫也履素弟子云今 上五年溽暑節  
望前三日丙子東膠老人眉叟書于明禮坊寓  
舍

### 柳希亮事

柳希亮字龍卿柳氏敗連坐絞於巨濟斯人者  
妻稱良善韓義禁典書為訣曰無相負云余心  
善之追聞之亦可悲臨刑問金吾小吏曰韓知

事有書否曰有出其書見之歎曰為我謝之當  
死刑人情安得不亂我平日作室於南郊因號  
曰祭郊今我絞於巨濟此先識也嘗名兒曰斗  
立今兒二十七死天之所定又何恨以此復之  
遂就刑云其不亂如此平日之操可知戊申仲  
夏上旬

### 朴守庵事

朴枝華先生字君實別號守庵受易於花潭好  
修鍊之術八金剛七年而返弟子請問其術先  
生曰遺世獨行之士或為之非學者之先務也



不言與北窓交相善北窓之弟古玉丈人師事  
之花潭終日觀數先生問觀數何如花潭曰天  
下大數中國先受其敗又問東方向何如不荅歷  
三世至崇禎流賊陷北京為奴所據朱氏絕不  
祀我 昭敬王癸未許學士銜謫甲山其夏有  
鬼妖降于甲山中女睢眦鉅齒蓬髮右握弧左  
握火邑發卒擊鼓彎弓以讓之學士作逐厲文  
先生聞之曰不出十年國大亂始於南方後十  
年壬辰果有倭寇兵革七年乃定壬辰之亂先  
生年八十餘子孫相失奔竄壽春史吞溺水死

先生斫木書曰曰鷗元水宿何事有餘哀先生  
精於數前知者然耶先生常守靜弗以事物經  
心性簡潔文章亦然

徐孤青事

徐起字待可本賤人守庵之友也博學為文章  
四方士爭師之人南岳燕谷山寺後老後出山  
以壽終湖西之人立徐孤青祠堂守庵銘其墓  
曰嘻待可生于東劬墳典賁躬一白石守幽  
宮江有月山有楓

李楠事



李楠者清州人徐孤青弟子也又從土亭遊潔  
身獨行箴名遁世者也鄭之升弋避亂錦山山  
谷中不得食將死楠遺數斗米一盪酒戒其子  
促行曰遲則無及矣其子至則果闔家飢餓不  
能起已數日即解其酒先灌之為粥以食之家  
得全後楠不受其謝愚伏公聞其名至清州求  
見之楠不見也楠死之後其子茂竹居清州之  
青川縣墨井里年幾八十云

記言別集卷之二十六終



